

Koblenzer Mundart:

Ha-Hatschi!

Dä Schnuppe es e lästig Iwell,
es e Gefehl, als wär mer grad
am Schele zwei Pond decke Zwiwell.
Die Nas es rut wie en Tomat.

Die Hand gieht wie en Scheiwewecher
per Tempo emmer hin on her.
Jo näjens es mer dovur sicher -
em Weltraum net, Stadt, Land on Meer.

Drei Daach brauch ä, om anzekomme,
su drei Daach bleibt ä bei ons stinn,
drei Daach guckt mer noch ganz ver-
[schwomme,
bis dä dann endlich fort doht ginn.

Mer kann deshalb deheim net bleiwe,
weil Schnuppe doch kein Krankheit es.
Dä Dokter darf net krank ons schreiwe.
Dat wär jo strofbar ganz geweß.

Jetzt wierd die Sach irscht richtig
[heiter.

Am Bau, em Büro, en der Schull
reicht jeder die Bazille weiter.
Die Leistunge sinke off Null.

Jo nese moß sugar dä Lehrer:
„Hatschi - Wieviel ist sechs mal neun?“
Do meld' sich flott dat Hänsje Scherer:
„Gesondheit“, säht ganz stolz dä Klein.

Katharina Schaaf

Katharina Schaaf

26. 10. 68